

Mario Condek buruz buruko bigarren deklarazioa egin zuen atzo Rivasekin

Banestoko buru ohiak gaur ere epailearen aurrean deklaratu du, iturri judizialen arabera

Mario Conde Banestoko presidente ohiak buruz buruko deklarazioa izan zuen atzo goizean Martin Rivas Banestoko kontseilari ohi eta egun banketxe honetan lanean diharduen inkulpatutako pertsona bakarra denarekin. Atzoko deklarazioa aintzakotzat hartuta, Condek lau egun egin ditu Manuel Garcia Castellon epailearen aurrean deklaratzeko. Eta gaur ere epailearen aurrean hitz egingo duela jakinarazi zuten Entzutegi Nazionaleko iturriek.

MADRIL

Mario Condek eta Martin Rivasek atzo izan zuten aurrez aurreko deklarazioa bien arteko bigarrena da, astelenean izan zuten eta lehenengoa. Hain zuzen, atzoko buruz buruko deklarazioa «astelehenekoaren jarraipena» izan zela adierazi zuen Rivasek eguerdian Entzutegi Nazionaletik irteetan. Hamar minutuz hitz egin zuen Banestoko kontseilari ohiak Manuel Garcia Castellon epailearen aurrean. Entzutegiko iturrien arabera, Banestoko lehendakari ohiak alderdi politikoei ordaindutako di-



Mario Condek laugarren egunez deklaratu zuen Garcia Castellon epailearen aurrean.

EFE

rutza izan zen bien arteko deklarazioaren ardatza.

Aurrez aurreko deklarazioa atzo goizeko saioan egin zuen Banestoko lehendakari izandakoak. Arratsaldean berriro itzuli zen Entzutegi Nazionalera galdeketei ekiteko, baina lerro hauek idazterakoan ez genuen deklarazioaren muinaren berri zehatzik. Guztira, 30 ordutik gora egin du deklaratzeko, eta horrenbestez, Espainiako egungo

historia judizialean inoiz egin den galdeketa luzeena eta zorrotzena da Mario Conderena.

Miguel Angel Gomez de Liaño Conderen abokatuetako batek azaldu zuenez, Banestoko lehendakari ohiak «bere jarrierari eusten dio eta lehen egunean bezala dago». Gainera, galdeketei «luzaro» iraungo dutela zehaztu zuen. Era berean, Arturo Romaniren kartzela autoaren aurka ezarritako errekurtsioari eman-

dako ezetza Entzutegi Nazionaleko Penaleko Gelan errekurritu egingo dutela iragarri zuen.

«FINANTZA MUNDUA EGOERA ONEAN DAGO»

Felipe Gonzalez Espainiako gobernuburuaren aburuz, «Espainiako finantza mundua egoera onean dago eta erregularitasunez lan egin du. Gainera, bai barruan bai hemendik at prestigioa du».

Eric Halphen epailea aurki fakturazio faltsuen auzia uzterat behartu lezakete

PARIS

Ustelkeria auzi batean inkulpatutako bati eskatutako dirua eskuratzeko uanean Poliziak atxilotu zuen Jean Pierre Marechal bere aitaginarreba «influentzia trafikoa» egiteagatik auzipetu dutela-eta (nahiz eta aske utzi duten ondoren), Eric Halphen epailea fakturazio faltsuen aferaz arduratzeari utzi beharrean egon liteke aurki. Berriki Michel Roussin ministro ohiaren kasuan diligentzia gehiago bideratuak zituen.

«Oraindik datu guztiak ez ditut eskutik baina justiziaren bideratze onak eta soseguak horrela agintzen badu, uste dut bere dossier hori utzi egin behar duela», adierazi zuen atzo

Pierre Mehaignerie Frantziako Justizia ministroak, Eric Halphen epailearen kasua aipatzean. Arlo politikoari lotutako ustelkeria auzi batez eta, zehazki, RPRren finantzamendurako sare baten ikertzeaz arduratzen den Creteilgo epaile hau nekean jarrita dago, bere familiarekin eta ardura duen auziarekin zerikusia duen afera bitxi batengatik. Izan ere, astearte goizean, Jean Pierre Marechal bere aitaginarreba atxilotu zuen Poliziak Roissyko aireportuan, Halphen epaileak RPR-en fakturazio faltsuen auzian auzipetutako batek milioi bat liberaz betetako maleta eman ostean.

Didier Schuller, Clichyko (Val-de-Marne) kantonamendu bateko zinegotzia, RPR alderdi gaullistaren finantzamendu ezkutuaren auzian Eric Halphen epaileak justizi azterketan jarritako 15 lagunetatik da. Berak emandako argibideen arabera, Jean Pierre Marechal berarekin harremanetan sartu zen urriaren 10ean eta erran zion suhia duen Halphen epailearekin «auziaren konpontzen» ahaleginduko zela, milioi bat liberaren truke.

De la Rosak kartzelan segitzeko agindu du Bartzelonako Entzutegiak

BARTZELONA

Javier de la Rosa enpresariaren aurka baldintzarik gabeko kartzela berretsi zuen atzo Bartzelonako Entzutegiak. Gran Tibidaboren agintea bere esku zuenean De la Rosak egindako kudeaketak herritarren artean «egonezina, eskandalua eta no-raeza» eragin zituela arrazoitu zuen Entzutegiak enpresariaren askatasunari ezetza emateko. Gainera, ondorio hauek guztiek sistema finantzarioan eragina izan dutela nabarmendu zuen kaleratutako autoan.

Horrenbestez, joan zen urriaren 19an enpresariari agindutako kartzela zigorraren aurka ezarritako errekurtsioa bertan behera utzi du Entzutegiaren Bigarren Atalak.

Joaquin Agirre auziaz arduratzen den epaileak eman zuen De la Rosa espetxeratzeko agindua ez-legezko jabetzeaz, iruzurraz eta Gran Tibidaboren deskapitalizazioan agiriak faltsutzeaz akusatuta. Iaz 10.000 milioi pezetako (400 milioi libera) galerak izan zituen enpresak.

Entzutegiko Bigarren Ataleko epaitegiaren arabera, enpresariari egotzitako operazioek «herritarren artean ikaragarriko zalantza sortu dute, batik bat Gran Tibidabo sozietateko akziodunen tankerako inbertsioak egiterakoan; eta zalantza horrek ondorioak ekar diezazkioke gure finantza sistemari». Horrez gainera, Agirre epaileak urriaren 19an agindutako autoan eta atzo berretsita «argi eta garbi azaltzen da Javier de la Rosa dela ustezko delituen erantzulea».

De la Rosak kartzelan segitzea «arrazoizko beharra» da Bartzelonako Entzutegiaren irudikoz: «Ikerketa judizialak hala behartzen du delitu ekonomikoak oso larriak direlako eta, gainera, akusatutako auziko frogak aldatu edo zaildu egin ditzakeen susmoa dagoelako». Ildo honetan, De la Rosak «diligentziak egiteko beharrezkoa den denboran» kartzelan egon behar duela baiezteko eskatu zuen Kataluniako fiskaltzak, bera aske egonik hori egitea ezinezkoa litzatekeela argudiatuta.

Laureano Oubiña behin-behinean askatzea berretsi du Entzutegiak

MADRIL

Entzutegi Nazionaleko Penaleko Gelak Laureano Oubiña galiziar ustezko droga trafikatzailaren behin-behineko askatasuna berretsi zuen atzo. Oubiñak 12 urteko kartzela zigorra jaso zuen 'Necora operazio' auzian, baina behin-behineko askatasunean geratu zen hilaren 7an.

Penaleko Gelak kalera tutako autoak baliorik gabe utzi du epaitegi honek trafikatzaila aske uzteko hartu zuen erabakiaren aurka ministerio fiskalak aurkeztutako errekurtsioa. Drogaren aurkako fiskaltzak hilaren 14ean aurkeztu zuen Entzutegi Nazionalak hartutako erabakiaren aurkako errekurtsioa. Fiskaltzaren aburuz, zazpi urteko kartzela zigorra osorik bete behar du Oubiñak eta, beraz, kartzelan egon behar du 1996. urteko ekainaren 9a bitartean. Horretarako emandako arrazoia Oubiñari leporatutako «gertaera larri-larriak» dira.

Kongresuak atzera bota du diru bereiziak ikertzeko batzordea

MADRIL

Espainiako Kongresuko bilkurak atzera bota zuen atzo diru bereiziak ikertzeko Talde Popularrak proposatutako batzordea. Proposamenak PSOE, CIU eta EAJren kontrako botoak jaso zituen, 169 guztira (142 diputatuk egin zuten haren alde).

Proposamena Francisco Alvarez Cascos PPko idazkari nagusiak aurkeztu zuen. Hark argudiatu zuenez, Luis Roldan Goardia Zibileko zuzendari ohiaren jarduna ikertu zuen batzorde parlamentarioak agerian utzi zituen diru bereizien erabilera okerrari buruzko frogak garbiak badirena. PPko ordezkariaren arabera, frogak haiei beste batzuk gehitu zaizkie gerora. «Guztiak dakiten sekretua da» Defentsa eta Barne ministerioetako goi funtzionarioei diru bereiziek in soldataz gaineko sariak ordaintzen zitzaizkiela. Proposamenaren kontra Alvaro Cuesta mintzatu zen PSOEko ordezkari gisa.

GERO. AXULAR

computerizatu versiones

Josu Lavin. PAIDEIA

Urkiola, 1. 1-C ☎ (94) 4300391
48990 ALGORTA-GETXO